

- P A B Ò P É Y I - M W E N -

*Déwò lapli-a ka tonbé,
É malgré tout finet-mwen bien fèmen,
Mwen ka santi van fwet-la ka souflé
Glasé zo-mwen, blésé lapo-mwen.*

(Plita lanej)

*Plita lanej-lan ké pozé;
Dépi tou piti mwen té anvè wè si sa té vré,
Tout liv té ka montréy si blan, si dous.
Mé mwen rivini, sa mwen lé,
Ritounen koté soley ka kouché.*

*Pa bò péyi-mwen ki tou piti anba siel
(Asou lanmè blé, an ti pwen a lorizon)
Anlè latè-mwen ki ni dousè siwo miel
(Épi laforé ka baý koulè an émeraude)*

*O lwen lannuit-la ka vini
San mwen wè koulè an réyon soley pou réchofé mwen.
Mé mwen imaginé la i ay kouché,
Séré anba bra péyi-mwen,
I kay souri lalin ka lèvé.*

*Pa bò péyi-mwen ni tout koulè lakansiel
(Sé la ou ka rivé fè tout nanm-ou chanté)
Anlè latè-mwen Bondié penn an lakwarel
(An môso paradi, fo nou sav kè sé sa Bondié ba nou)*

*An ti réyon pèsé pou mennen mwen alé,
Asou an bel niyaj blan mwen kay janbé loséan.*

*Pa bò péyi-mwen ki tou piti anba siel
(Ni tout koulè lakansiel)
Anlè latè-mwen ki ni dousè siwo miel
(Bondié penn an lakwarel)*